

## UNE, SANTE, CATOLICHE E PREPOTENTE

La cuistion dal intervent dal Vatican tal câs de ore di religion no finis di scaturî chêi ch'a pensavin che certs pastîei a fossin passâts di mode. Inveçit chî la Glesie a palese une sô continuitât.

Nissun nol met in dubit che i catolics e àn dirit di domandâj al Stât libertât di crodi e di studiâ la lôr religion. E i vescui, in chest câs, a ripuartin la volontât dai catolics, in plene reson. Plui discutibil il fat ch'al veti di jessi il Stât a furnîur ai catolics mieç e bêz ch'a son di ducj, anje di chêi ch'a àn un'âtre religion o ch'a nond'ân piç. Plui discutibil ancjemó che chescj valôrs, come la istruzion religjose, a vegnin compatâts cun tant di concordât. Par dâj al mont i valôrs morâi e i siei tesauris, àe dibisugne la Glesie di doprâ une fuarce che e à dut il savôr di un ricat politic? Àe cussî pocje stime de sô robe? Ese cussî pôc sigure de int, di chê int che e à vût, fin cumó, oris e oris di religion in te scuele? Àe pore che, s'a metin la religion facultative, nol vegni plui nissun?

Ma i vescui e àn palesade anje nissune stime in lôr stes. Prin di dut cuanche si àn lassât passâ un concordât sul lôr cjâf cence dî un et. Sono o no sono lôr i pastôrs de Glesie taliane? O sono dome i galopins dal Vatican? Podopo cuanche Poletti al à pastrocjade la cuistion cu la Falcuce e ducj si son cjatâts a robis fatis. Ce idee àno di democressie e di colegjalitât venti-jú? Cumó, ridusuts cence dignitât e cence fuarce, a van a clamâ la gnagne, il Vatican. E il pape al rive adiriture a impegnâ la sô sinte di “vescul di Rome e di pastôr de Glesie universâl” par imponi un'ore di religion tune scuele che di religion and'à pocje e a une int che a domande la religion il 90 par cent e a va a Messe nancje il dîs par cent. I vescui no viòdino chestis robis? No si vîsino di tros ch'a àn votât pal divorsi e pal abort? O di tros ch'a no votin chel partît che lôr a fasin propagande? Tîrino fûr i numars dome cuanche ur torne cont?

Une volte i oms di Glesie, soregut il pape, al ere tant in alt e al ere tant pegri in tal fevelâ che la int lu viodeve come un diu. E a veve in lui un pont di riferiment cuanche al fevelave e cuanche al taseve. Cumó il pape al va pardut, al trate di dut e lu contestin in dut. Al cuiste in chilometri e al piert in dignitât, parceche al à dibisugne dai baracons e dai cjamps di balon par vendi une marcansie simpri plui discjadude. Cun chest sisteme che il pape al à di savê dut e decidi di dut lui, al sta pierdint credibilitât ogni dì ch'al passe. E i vescui, ch'a no puedin dî plui nuje, a son lì come cunins, int cence dignitât e cence onôr, disperade a viodisi la barache a lâ in sfas e rassegnade a ripeti, ognidun in te sô lenghe, lis stessis peraulis ditis de stesse persone ch'a sta tentant di espuartâ in tal mont une esperiense religjose e politiche vive tanche si ûl ma simpri limitade. Il danp al é plui grant di ce ch'al semee, parceche cul volê fâ dut lui, il pape al sta sassinant dutis lis ricjecis des glesiis locâls e dute la gracie di Diu che e jé semenade in tes culturis tal mont. I vescui, cu la lôr passivitât, a lassin che si copi lis lôr glesiis e a tasin denant di un vêr omicidi-suicidi ecclesiâl e culturâl. Âtri che unitât e comunion!

Cun tun pape a Rambo vie, cun tune curie romane simpri plui prepotente e acentradorie, cun tune meneçade di vescu bogns dome di piulâ a comant, no si pò spietâsi fûc e flamis nè dai predis nè de int. Difât i predis a son rassegnâts e a no viodin l'ore di passâ di là par finî di penâ di ca e a no mandin plui nissun in seminari, e la int, passude e ingomeade, si sbonbe. Nol è colpe il consumisin o il comunisin o il balon se la int no bassile plui pe religjon. Al é che j àn gjavât il misteri, le àn banalisade metinle ancje in tal gjelato, ti àn fat sù dut un pastiel di politiche, di bêz e di Spirtu Sant e la comedie e sta stufant. Parceche a varessin di vê, amancul lôr ch'a misurin il timp a secui, ancje un pocje di memorie. E soledut di coerense. Cemût mai che, cuanche si tratave di lassânus preâ par furlan, il Vatican al à tirât fûr la pantiane che lui al vares molât ma al ere il guviêr talian che nol voleve? E cumó che il guviêr talian nol ûl l'ore di religjon obligatorie, parcé j dano jù pes mans invessit di rispjetâ la sô volontât? Alore la Glesie si fâs sintî dome cuanche j smeche. E no à di vê plui nancje il sens des proporzioms. Parceche la vite e la culture di un popul, ch'a son la fonde ancje de religjon, a varessin di valê di plui che no un'ore di religjon fate a int ch'a spiete dome di lâ a zujâ. Lì al ere il câs di impegnâ il titul di pastôr, tal difindi lis minorancis, ch'a son un dirit naturâl sacrosant. E no tal difindi un pastiel che, se no lu fasevin, a vevin dut ce vuadagnâ tant il Stât che la Glesie. Ma al é dibant fevelâ cun tun ch'al sint dome la sô e ch'al partis za cun chê di vê reson. In dut e in ducj i cjantons dal globo.

*Otubar 1987*

*Pre Antoni Beline*